

Cursa averta – decisiva è la dinamica dals ultims dis

Tge dian ils set parlamentariss grischuns sunter ils hearings

DA CLAUDIA CADRUVI / ANR

■ **Sunter ils hearings dal mardi crescha la tensiun. Tuts trais candidats da la pps èn bain en cursa. Ils parlamentariss grischuns raquantan tge impressiun che Norman Gobbi, Thomas Aeschi e Guy Parmelin han fatg.** «Jau na less betg stuair metter patg tgenin dals trais candidats che vegn cusseglier federal», di *Martin Candinas* (pcd). Gobbi haja fatg ina fitg buna parita ed haja gudagnà simpatias. Lentschatta hajan ins chapì il ticket cun trais candidats sco ina suletta candidatura – numnadain mo quella dad Aeschi. Uss sunter ils hearings saja la cursa averta.

Candinas na less betg tradir sch'el è già sa decidì tgi eleger. Mo tant: «Jau hai simpatias per ils represchentants da las regiuns minoritaras.»

«Strusch experientscha da vita»

«La dinamica dals ultims dis po anc midar bler», di *Stefan Engler* (pcd). El regorda a la candidatura disgraziada da *Bruno Zuppiger* avant quatter onns. «Jau crai ch'ins ha pir il di avant l'elecziun tuttas infurmaziuns basegnai-vlas.»

Il mardi passà ha Engler gudagnà suandant' impressiun: Aeschi saja giuven, dinamic, fitg lavurus e possedia strusch experientscha da vita. Gobbi saja in animal politic che haja percurri già tuttas fasas d'ina carriera politica. Parmelin saja sa preschentà a moda equilibrada e temprada cun il giavisch da betg separar, mabain da chattar



Ils candidats uffizials da la pps per il cussegl federal: Thomas Aeschi, Normann Gobbi e Guy Parmelin.

FOTOS KEYSTONE

cumpromiss. Ils hearings hajan purschì «in emprim maletg», ma els muntian mo in da plirs elements, di Engler. La pcd decida pir il proxim mardi, pia il di avant l'elecziun, sch'ins dat or ina recumandaziun u lascha liber la vusch.

«Betg adattads»

«Tuts trais na paran betg adattads», di *Silva Semadeni* (ps). «Els seguan la lingua dira da la pps. En il cussegl federal duvrain nus personalitads concordand-

tas ch'èn prontas da far cumpromiss». Dals socialdemocrats pretendian ins adina ch'els preschentian candidats moderats per il cussegl federal. La pps proponia dentant persunas radicalas da la dretga. Perquai elegess Semadeni pli gugent insatgi auter da la pps, per exempel *Hannes Germann* u *Thomas Hurter*, omadus da Schaffusa.

Da Gobbi sco candidat ord la Svizra taliana n'è Semadni betg inchantada. El derivia da la Lega – ina partida

che discrediteschia cuntinadamain il cussegl federal. «Igl è uras che la lingua e cultura taliana èn puspè represchentadas en la regenza svizra. Però na uschia.»

La notg dals cuntels lungs

Tut auter tuni tar *Martin Schmid*. «Per mai èn tuts trais elegibels. Jau sun da l'avis ch'ins sto eleger ina persuna che vegn acceptada da la pps.» Las experientschas dals ultims onns hajan mussà

ch'i na saja betg bun da vulair sfurzar si ad ina partida in cusseglier federal ch'ella na vul betg.

Sco Engler di era Schmid che las decisions crodian pir ils ultims dis. Forsa en l'ultima notg? La notg dals cuntels lungs en il Bellevue? «Gliez è plitost mo ina legenda», manegia Schmid. En l'hotel Bellevue a Berna regia la saira avant l'elecziun mintgamai in schuschuri da schurnalists. En quel ambient na crodian segir naginas decisions impurtantas.

Era la pbd ha manà atras hearings quest'emna. Tranter ils trais candidats na dettia quai naginas differenzas enormas, di *Duri Campell* (pbd). El veglia anc sclerir duas, trais raubas fin ch'el sa decida per in candidat.

Brand e Martullo?

La pps sezza n'ha fatg nagins hearings, pertge la partida ha gea già tadlà ils candidats avant duas emnas cura ch'ins ha tschernì il ticket. *Magdalena Martullo-Blocher* (pps) di ch'ella na sappia anc betg a tgi ch'ella dettia la vusch. «Jau pudess viver cun tuts trais. Impurtant è ch'il nov cusseglier federal maina bain ses departament ed ha influenza sin l'entir cussegl federal. Gliez vesan ins pir sch'i sa mida insatge.»

Heinz Brand (pps), che n'ha survegnì nagin plaz sin il ticket, na less betg tradir tgi ch'el sustegn. Tant Brand sco Martullo manegian che la fracziun dettia liber la vusch. Sche la partida dess ora la parola per in u l'auter candidat dischavuass quai las candidaturas da las autras regiuns.